

孫徵君日譜錄存

孫徵君日譜錄存卷之三十四

康熙十二年癸丑九十歲

五月

後學

汪邑王
武涉王

格
校訂

初一日

在孫徵君孫孫

十二世容

或問邇來談學者謂註經難而註尙書尤難尙書乃
夫子之所序定者今傳世有今文古文之不同有
難離平易之互異故易有程子之傳朱子之本義
春秋有程子之傳詩有朱子之集傳程朱俱不註
書朱子僅屬之蔡仲默仲默每註一篇輒請正朱
子然其前一與禹謨遙相館且漢人表章六經易

有數家詩分爲四春秋分爲五獨不及書此皆註
書之難也此語果然乎余曰就其難注者言之誠
難然書卽艱澁較易之有畫而無辭者何如況詩
書執禮皆夫子所雅言也未可以倘不及注而遂
謂其難注也學者讀有字書全要識無字理

腐儒曲士不可與言學有體而無用耳天位乎上地
位乎下聖人以參贊而成位乎中全以其用言也
大學明德爲體親民爲用中庸中和爲體位育爲
用此其大較也就堯一身言之欽明文思爲體光
被四表格上下爲用就欽明文思四字言之欽明

爲體而文思爲用至於中者誠敬精明則發於外者煥然而周至矣就一字言之欽體而明用思體而文用就一字言之欽又兼體用而爲言也體用何嘗有定在亦豈容分之爲二物哉紫陽之言曰用力之久一旦豁然貫通焉則衆物之表裏精粗無不到而吾心之全體大用無不明矣其斯之謂乎

初七日

孟子曰盡信書不如無書此語開人心口所謂讀有字書識無字理耳其言曰仲尼之徒無道桓文之

事者管仲相桓公一匡天下此語豈不聞但孔子崇伯功之意與孟子鄙伯功之意固各有說並行不相悖也又云公劉好貨太王好色各就一時當下之語以引君於當道公劉豈真好貨太王豈真好色哉至如凱風不怨母之不善于不忍言有子七人莫慰母心苦極矣慟極矣以意逆志是爲得之經書中此等語甚多偶因友問而拈此

初入日

周元公教人尋孔顏樂處孔子之樂曰蔬水曲肱而
在中顏子之樂曰簞食陋巷而不改此分明是樂

貧樂道而曰非樂貧也亦非樂道也然則所樂者
何物亦曰樂學而已時習而悅則無在非樂甯止
樂貧不時習則無一可樂又安知所謂道而樂之
哉學然後樂樂然後學不樂不學不樂王素
州所以有樂學歌

初九日

鍾生爾知自都門來爲余言蔣虎臣遊峨嵋端坐而
逝遺詩云俯然獲鶴本相親老衲無端墮孽塵欲
向蘆湯求避熱那從大海去翻身功名傀儡場中
物妻子骷髏隊裏人只有君親無報答生生世世

祝能仁蜀撫疏聞禮部覆命奉 旨建塔此殿之
數抑褒之歟如其貶也虎臣原清修士世味淡如
不忘忠孝渠原不諱談禪如其褒也君臣以二帝
三王之道治天下上之教矣民胥倣矣豈可以訓
此時廟堂諸公多知學者不知何以處此虎臣庚
戌冬過夏峯爲其尊人中完公文集求序又爲其
大父求墓誌辛亥春復過夏峯憇余樂是居者久
之塵外之意自不可忘故聞言而錄以俟後之君
子考衷焉

初十日

我讀鹿鳴之詩曰我有嘉賓鼓瑟鼓琴我有旨酒以
燕樂嘉賓之心總欲其示我以周行蓋君之所以
禮遇其臣者至矣天保之詩曰如月之恒如日之
升如南山之壽不騫不崩如松柏之茂如不爾或
承則臣之所以忠愛其君者至矣此與虞廷賡歌
之意同一揆也

十一日

我讀蓼莪之詩曰哀哀父母生我劬勞無父何怙無
母何恃欲報之德昊天罔極蓋父母之德原是報
不盡的須如曾如閔始是酬報萬一徒以誥贈爲

顯揚終是第一義我讀棠棣之詩曰凡今之人莫如兄弟兄弟既翕和樂且湛蓋言兄弟之恩異形同氣死生苦樂無適而不相須卽有閔賻外禦其侮此兄弟之手情萬不至雖有兄弟不如友生詩人蓋深刺之以示戒也

十八日

居業說 稿入集

寄魏彥極書 稿入集

十九日

語張子發 周元公士希賢賢希聖聖希天三箇希

字一直欲到天上去此語蓋從孔孟志學尚志中
看出立與不惑是希賢希聖事到知天命從心不
踰矩則直與天游而人不與焉居惡在仁是也路
惡在義是也此亦希賢希聖事大人之事備矣亦
只是讓精仁熟則與天爲游而人不與焉總從此
志中發皇孔子好古敏求孟子靡學孔子纔是千
古有志人我輩不能遠立此志願物誘深而膽力
薄則陽明責志說日宜三復以勵吾氣

二十日

周元公曰人不幸不聞過大不幸無恥言黃言平有

所用恥則爲聖爲賢無所用恥則爲愚爲不肖故
夫子與子貢論士首揭行已有恥不辱君命稱孝
稱弟必信必果皆行已有恥也否則無恥矣恥者
生人一點不昧之良行道之人弗受乞人不屑皆
恥之所流露但幾希乍見忽起忽滅惟賢者能勿
喪耳我輩不必言做聖賢做豪傑只求免於無恥
而已

二十一日

人生天地必有與立其不能立者是無志氣夫志吾
志也氣吾氣也無之尙得爲人乎靜言思之舉世

皆生而奄奄殆盡則志氣之銷亡也久矣夫子曰
匹夫不可奪志孟子曰配義與道有不可奪之志
氣則不受制於造物將何事不可爲能配義與道
則能贊化育之流行堯舜湯文周公皆從志氣中
辦出一節不可磨滅之事而堯舜湯文周公之面
目遂萬古常新愈久而光輝愈發越志以帥氣氣
以輔志言志而氣在矣言氣而志在矣言立志養
氣而盡性至命一以貫之矣故千古聖人只此一
箇物一件事

先儒謂吾人一日之間便有上古中古叔季之象余嘗思之一念之恬愉卽唐虞三代之象一念之紛競卽春秋戰國之象一日之間此念遷轉不知凡幾能令此心之常恬愉而無紛競則世界卽有捨攘而吾心原自雍熙則日在光天化日之下而時時享安居樂業之休如必際唐虞三代而身始樂則春秋戰國時孔孟亦難度日矣鹿江村之言曰當下自有樂地願外便惹愁腸故君子欲其自得之也

二十四日

語梁貞怡曰學問要有頭腦無頭腦從何處下手下手做到何處終身茫蕩畢竟一無所成高忠憲曰學問起頭要知性中間要復性了手要盡性只一性而已堯舜湯文周孔諸大聖人端不待此性之分量然其下手做工夫總之一枚而已故性以敬知性以敬復性以敬盡先儒每教人居敬窮理所以明此性也以友輔仁所以共明此性也得此把柄在手則日用間應事接人饑食渴飲無時無處而非性之所流行散見也

二十八日

姜定菴遺其子亮字汝皋來夏峯問學

二十九日

臨漳王荷興字熙載孫爾核字天木二子介耿保汝
字來贄

六月

初二日

答姜定菴書 稿入集

答劉心洲書 稿入集

初三日

口占勉熙載天木 漳水有二子標格迥出塵孝友

無間言矩步有持循心同金可斷味投蘭自芬聯
袂過兼山一見輒相親披襟繁縵滌矢口肝膈陳
連夕南州榻談興欲津津日譜錄數則聿當揮塵
頻道東有耿子相望鬱德隣二仲應交權講習當

日新

初四日

語熙載天本曰聖人垂訓立教直欲天下萬世皆入
於聖賢之域其四教曰文行忠信其雅言曰詩書
執禮只是在用上說所謂吾無行而不與二三子
也孔子沒孟子方說出心性孟子沒秦漢儒者多

求諸訓詁濂溪明道說性命入微妙矣紫陽出不
得不從躬行實踐上說知得孟子之言便知孔子
之言精妙知得朱子之言便知周程之語著實

初五日

奇陳困鎖 尊君小我六歲乃先作古人耶慟悼何
言賢昆玉仁孝情何以堪嘗聞之先正發憤力學
多在讀禮之時蓋用極難報孺慕正切此在君家
更不川老夫之多言耳賤體尚可稍支褻大專有
期還欲作數行文宇以見七十年世好之誼

十一日

鍾爾知名國士十年前從其先生郭九如同拜而九
如今以門孫自處今仍正師弟之名以書贊其意
十七日

語鍾爾知曰聖人之言極坦易極精微是在讀者之
領會如瓊路請于之車于路使門人爲臣高景逸
以爲窮理盡性之至獨異於佛氏言性處念臺謂
夫子當日原自說得分明實車買榔無臣有臣正
是一副見成道理雖愚不肖可與知者此之謂天
然自有之理此之謂天然自有之性門人輩爲
私意所動故憤憤兩先生皆大儒而所見如此不

善會之及成朱陸矣。要知劉之見從高出。有前說不可無後說。正不妨並存耳。讀有字書。識無字理。學者執泥。聚訟受病。皆緣不識無字理。

十八日

復李鄴蕃書 稿入集

語胡延長曰。程子云。未讀論語是如此人。既讀論語。仍是如此人。便是不會讀。所謂飲食而不知味。讀書破萬卷。總是不識字。謝上蔡對客拈子見齊衰。師見見二章曰。讀論語要從此處看。聖人心事。此纔是會讀論語者。

敬無間斷便是誠心有間斷便非敬若敬則自無間斷非敬即是誠敬則所以誠之也故曰涵養須用敬念臺云學者只持守可觀而和靖於涵養分止大是得力

十九日

易云繼之者善也成之者性也孔子性相近是就質美者說習相遠是就質濁者說孟子道性善是謂質雖濁而性之善自具故謂人之有四端也猶其有四體也驗之於平旦夜氣微之於路人行乞力辨告子之非是將先後天理義之性氣質之性一

齊弁出來爲立教之宗厥功偉矣內聖外王總不離一性字內聖外王之學總不離復性二字復性之外安有學問哉

二十日

寂然不動感而遂通此聖人境地學者不可輕言真實學道之人只合於日用之間戒分外之事嚴願外之思德不可以其小而不慎心不可以其微而不謹無事時存養有事時省察省察此而已存養省察之久而分外之事願外之思漸清此時遂昭然揭出一段不昧之靈光此之謂不

失其本心保得此心不失須是素位而行不願外
之君子

二十四日

題戴定園偶見續錄 稿入集

二十五日

題周拙菴蘇門獨釣像贊 稿入集

七月

初一日

夜來不能安眠因憶夷齊採薇窮食周粟爲故主也
嚴陵共臥不專王侯存故人勉而許由以堯讓而

洗耳由何爲也哉誠大怪事靜言思之古今來不可少由一人無由則天地未免窄小一富貴盡之矣靜修先生題許出掛瓢圖云堯天萬古大無鄰何地容君作外臣莫占箕山最深處後來還有避秦人余云堯天既已大無鄰何地不容作外臣到處一瓢無外慕卓哉萬古之高入

初五日

心一物耳聖賢言心須合天下國家身心意知物而一貫之纔是心之全譜故一盡心而知性知天無

餘事矣

初七日

大哉聖人之道論本體一性盡之矣故中庸首揭天命之謂性論功夫而復性之道一慎獨盡之矣能慎獨則中和而天地位萬物育道豈有餘蘊哉

初八日

道不可須臾離正爲道本之天命之性一刻離便與天命隔斷故君子就所親而戒慎乎其所不親就所聞而恐懼乎其所不聞直是時時與天命相對越無隱見無顯微無隱見顯微之謂獨故君子慎之

初九日

無極而太極獨之體也一獨耳指其體謂之中指其用謂之和總是純乎天理之極而無一毫人欲之私故無欲二字直下做到聖人濂溪可謂窺聖蘊矣白沙詩云無極老人無欲教一番拈動一番新

初十日

從來學者多以敬字爲入門一不敬則隨俗習非茫無所主將何事不可爲先儒云主一之謂敬心本有主主還其主便是主一

十三日

十三日

夏峯友聲題辭 稿入集

十四日

孔子言易有太極者言陰陽變易之中而有至極之
理是就氣中指理以示人周子無極而太極言雖
無聲無臭之中而有至極之理則專以理言無極
而太極天地之性也以不雜者言之也太極動而
生陽靜而生陰氣質之性也以不離者言之也總
之一太極天地之性氣質之性一而二二而一者
也孟子道性善言其不雜程子謂善固是性惡亦

不可不謂之性言其不離

十五日

一本萬殊萬殊一本之理要開眼便能見得如忠恕
二字一箇忠做出百千恕無忠則做恕不出喜怒哀
哀樂未發爲中中節爲和然中不可見而和可見
中其一本而和則爲萬殊也程子曰性者心之理
也又曰心統性情以其具衆理而應萬事則性其
一本而心則萬殊也諸如此類甚多知此則體用
一源竊後無間開眼便見

爲甥孫張德符立祠說

十六日

知晝夜則知死生矣晝則必夜夜則必晝是自然之理非將昨日晝夜來作今日晝夜是昨日晝夜盡了今日晝夜再生造化不窮往者過來者續舊者滅新者生自然而然死生便是此理精氣爲物物使生是聚也始也游魂爲變物使死是散也終也彼死生輪迴之說豈足言造化之道哉

十七日

孟子仁人心也一語似說心卽是仁然以仁存心仁義禮知根於心其言亦出於孟子孔子稱回其心

不違仁仁之與心固當有辨蓋偶見仁甚切於人而不可失與下文人路之義同故李延平亦謂孟子不是將心去訓仁學者須識得此意方可語識仁

十九日

程子以盡性至命必本於孝弟蓋孝弟是性命中心事至親至切此處能省察力行性命豈外是哉故曰孝弟爲仁之本又曰堯舜之道孝弟而已矣

二十二日

贈虞城劉木天

陽明王子明之大儒當世學者推

爲孟子之後一人然其教言無善無惡心之體一語犯告子無善無不善之言及其身遠有識之爲儒學至今人猶有疑其爲禪學者晉菴先生論性獨曰陽明教言是討心非論性性與心豈容混而爲一只此一言破百年之疑定千秋之案余極快心於斯語本天君親承師訓敬述以請教

二十三日

聖學到底只一敬字端肅儼恪是敬之入頭處提撕喚醒是敬之接續處至一無適漭然統一是敬之無間斷處惺惺不昧精明不昏是敬之效驗處宋

于言敬者一心之主寧或爲非以爲心能主
敬敬豈能主心曰心主敬即放能敬即存非心
之主而何

二十五日

連日服藥時覺病魔心君寤寐交攻夜來鷄鳴之類
奮殺賊之氣微有戰勝之意爲拈此句 雲路風
清聳自平無端意念擾虛靈鷄鳴憤發降魔力依
舊堯天舜日明

二十六日

喜怒哀樂有未發之時而未始淪於無故先儒以未

發爲陽之動喜怒哀樂爲發之候而未始潛於有
故先儒以發爲陰之靜動而無動靜而無靜性之
所以爲性也故莫見乎隱亦莫隱乎見莫顯乎微
亦莫微乎顯此之謂體用一源顯微無間學者不
明於此便是痴人前說夢

二十七日

程伯淳見獵有喜心謝上蔡十年不能去一矜字陸
河東二十年治一怒字不去此皆大儒親自體驗
之言莫看的容易大凡看的容易者皆口頭承當
也不曾實下功夫

二十八日

顏子一陋巷貧士志欲希舜人似信不及不知出乎
舜則入乎鄉人勢不容中立洵可憂也俗之爲田
宅與馬雅之爲琴書大之爲功名小之爲技藝須
一一對壘過而朱子獨約以財色兩闕古今史冊
上賢知一流人其享用在此其埋沒亦在此非拔
俗之豪傑烏能免於鄉人哉

二十九日

或問聖人可學而能然古今學聖人者不知幾千萬
人而見知聞知之統寥寥幾人焉賢知愚不肖之

遇不及者不必論橫渠大儒也十五年學箇恭而
安不成惡在其聖人可學而能也程子亦曰可知
學不成有許多病痛在余曰此見其學聖處早或
實學聖再加十五年功夫仍見其未成也一自以
爲是則全體皆非愈學而愈遠矣

三十日

舜禹有天下而不與要看到著底處則我輩之眼界
自寬舜一生只認得自己是庸人故曰人心惟危
蓋稟乎有難於頃刻即安之意故一生只是舍己
從人好問好察木石鹿豕可以居遊若云以天下

爲愉快舜實無此念也所以丕峯造極做到聖人
地位大禹只是克艱一生得力在勤儉二字所謂
勤將補拙儉以補過思天下之溺由已溺之安能
以天下爲得意乎此舜禹所以有天下不與非虛
言亦非勉強也念薰謂顏子善學舜曾子善學禹
有爲者亦若是顏子固言之矣曾子之忠恕日省
儉亦禹之克勤克儉不自滿假者乎

樂於未放伐之前一日猶是天下之共主當放伐
之日則爲天下之獨夫天之所不能佑人之所不
能庇有天下不獨舜禹不與焉即湯武亦不與焉

一有與天下之心使非聖人矣夷尹惡得百里之
地而君之皆能朝諸侯有天下行一不義殺一不
辜而得天下皆不爲此不可以律漢唐宋三代之
命主而况其他道統所以不在上而在下也夫子
賢於堯舜其在斯乎

八月

初一日

送王夢航任贛南觀察序 稿入集

初二日

孟子謂今之求富貴利達者其妻妾見之不羞而相

泣者幾希又謂人之所以異於禽獸者幾希謂人
有鷄犬放則知求之有放心而不知求哀哉又謂
仁人之安宅也義人之正路也曠安宅而弗居舍
正路而不出哀哉謂人人有貴於己者弗思耳又
謂拱把之桐梓人皆欲生而養之至於身而不知
所以養之者豈憂身不若桐梓哉弗思甚矣兩箇
幾希兩箇哀字兩箇弗思有多少打動喚醒人心
處讀者宜怛然汗下恥心自生憤氣自發若只依
一段閒話看過便是不曾讀象山讀孟子而有得
也遂能直接孟子姚江讀象山而有得也遂能直

接象山江村讀姚江而有得也。堯能直接姚江此纔是善讀書人。

或問孟子於一體具體者而曰姑舍是於夷尹惠三子曰不同道乃所願則學孔子也。遂能直接孔子然則孔子何師乎曰子貢有言文武之道未墜於地則是誠大識小之賢。昔其師也夫子自言曰三人行必有我師。善者從不善者改則其善不善皆其師也。子思言祖述憲章上律下齊則又見帝王天地爲師矣。然纔是龍自稱師而求之有師師非兩件也。所以爲萬代帝王師親師取友者知此義。

則無時無處不受師友之益矣

初三日

人有三等上智下愚與中人上智下愚少而中人多
上智不廢學力而不恃學力此心常得空明下愚
不知學力爲何事此心放逸已久所請視不見聽
不聞食不知味非不移也難移也獨此中人乘於
物感不能不恣爲情識膠於意見不能不執爲勝
氣紛紛雲擾翳我空明此時而加意提撕則空明
自若不然則積蔽日深漸至昏昧遂成不移之愚
可不慎哉上智不費學力朱子所云畧綽提撕言

用力之無多也人一已百人十已千日日提撕時時提撕則愚可明弱可強矣學力之時義大矣哉

初四日

語劉雲林曰士先立志志不立天下無可成之事然內攝外誘志亦未易立也故陽明有責志之說夫子自十五志學到得耳順從心纔完志學之事孟子以尚志爲士之事曰居仁由義大人之事備矣是志也豈容一日不立豈容一日不責哉雲林從遊有日今過兼山堂乞額其讀書之齋余題曰尚志因出陽明王子止生茅子貢志尚志二額以示

勉

初五日

語郭孚伯郭熙侯曰劉念臺云聖人於道體指出一
易字大是奇特只此一字將天地間無一事不攝
入於吾心近取諸身遠取諸物只見得此理平分
物我無大無小直是括潑潑地令人不可思議燕
湖所以有心易之說蓋無人不具此心易也二千
學易久故以此言志勉

初六日

語張動子曰君子之無適莫孔子絕四猶只是一箇

行無所事蓋日用之間動靜云爲莫不各有自然之理能順以應之如饑食渴飲夏葛冬裘不起一見則亦無往而非道矣纔起一見便屬我見強我合道動成障碍從古賢知之士做出多少驚天動地之事總只是無事生事故曰天下本無事庸人擾之耳

初七日

周磯公索書 士先立志志不立如無舵之舟無脚之馬安所適從有覆溺墮躓而已延津周磯公以讀禮之時遠室家而讀書蘇門其器識可知已先

介楊新礪通姓名繼借李晉生過余兼山堂襟期
開朗語言清亮於吾言無所拂逆余因與言前輩
名儒多從讀禮時做起蓋仁孝之人當讀禮之際
孺慕倍切故發念最真礎公似隱然有味於中也
因屬韻兒索手字故叙其論交之始以俟他日友
道之終

初十日

夜間不寐偶成贈王夢航 南贛雖云僻而遠新建
旌旗在眼中天地百年光射斗比肩接踵見英雄

十一日

孟子敘道統之傳見知者或二程人蓋同時親

炙之者其見既真其論自平見之有功於聞也大矣孟子學於子思故以見知自負孔子後漢唐宋既不足當百年之興王則道統不得不屬之元公矣程朱其其見知者也承元公者吾友鹿江村以爲定屬之姚江然有議之者論尙未定邈來學者有稱爲孟子後一人者有謂與濂洛並峙千古者有謂與濂溪明道宜並列四配十哲之間者則陽明之學將大明於天下斷不至沈淪於後世庶足慰江村四十年特達之知矣

十二日

偶憶生平所知楊忠愍死權相左魏周死逆璫其直
聲烈節日月爭光百世而後令人瞻望然念當日
獄中之苦以父母所生之身而罹此凶慘想孔孟
處此不能化小人爲君子則有引身而退耳或不
必定要與惡人作對頭

十三日

孝者所以事君也忠孝無二理亦不分輕重然古人
有言親在不敢以身許人又云不以三公易一日
之養則親者吾身之親而君者天下之共主也甲

申曰：變聞有以諸生辭母妻投江而殉義者，慕忠君之虛名而絕孝親之實理，亦忍矣哉。

十五日

客問：趙苞溫嶠徐茂三子者，優劣何如？曰：苞奉君命守封疆，勢不得棄城以令母，然揮兵一戰，母頭落地，此心亦大忍矣。苞宜與共事之人言我輩以城爲存亡，君等大家同心戮力以報天子，我下城與老母死一處，庶遊魂得侍母靈以歸故鄉耳。嶠無所事事而絕裾以爲小失，余謂古人不以三公易一日之養，嶠當絕裾之時，已置母於度外矣。尚

何顯身顯親之足云 庶雖以母之僞書而歸以
致母氏殞命然非庶之所能逆料也庶只得別豫
州而去苞嶠二子心太忍庶心不忍此中相去豈
千里耳庶終身不設一謀苟全性命於亂世亦足
對元德不愧爲孔明之友

十六日

人不能取友雖直諒多聞日在側與我毫不相干能
取友則得一勝已者因知我之不若則勝已者吾
師也有憎已者因知我之不肖則憎已者吾師也
有疑已者因知我之未信於人則疑已者吾師也

有異已者因知我之尚同於人則異已者吾師也
此之謂能自得師學者第一當講這段便是希賢
希聖之路

十七日

廣土眾民君子欲之所樂不存焉中天下而立定四
海之民君子樂之所性不存焉君子所性仁義禮
智根心生色睥面盎背獨此是人生真樂君子王
天下而不與舜禹有天下而不與都是憑這一點
受用聖賢千言萬語只是教人復性然無浮雲宮
貴之懷到底不能復性到底不成學問

十八日

顏淵曰舜何人也予何人也有爲者亦若是要看出
淵非空言無當所以真實爲舜之意舜之飯糗茹
草木石可與居遊而好問好祭樂取諸人以爲善
顏之簞瓢陋巷不改其樂而問不能問寡得一善
則拳拳服膺舜與淵遇有窮達而道無加損也至
今讀有爲者亦若是一語有多少風力在

十九日

子曰有能一日用其力於仁矣乎我未見力不足者
蓋用力而力足無棄人之不用力何也又曰仁遠

乎哉我欲仁斯仁至矣蓋欲仁而仁至無柰人之不欲仁何也仁則安不安則危仁則榮不仁則辱仁則爲聖賢爲豪傑不仁則爲頑冥爲禽獸則仁之繫於人何如而人都不知欲所欲不在仁則必在不仁不欲仁則必不用力於仁故多自驅於陷井而莫之知避也此之大哉經由不知學顏子一聞克復四勿之訓言下承當曰回雖不敏請事斯語是之謂真欲仁而實用力故夫子曰回也其心三月不違仁彼日月之至者好學不如回故不違亦讓回學之時義大矣哉

二十日

周濂溪無欲故靜此千聖秘訣也故白沙句云無極
老人無欲教一番拈起一番新程伯清生平令人
不恐欺新法之爭安石亦不深忌伊川每云此某
不及家兄處伯清德性和粹老夫更爲醉心而師
法之學者變化氣質當取法伯清伯清之言曰吾
學雖有所本天理二字是自己體貼出來學伯清
又當自體貼天理始友郭隔遠不獲常相晤臨臨
語此志勉

二十一日

容問做人宜從何處做起爲學先從何處學起曰便
從當下做起如當下所交接者何人酬酢者何事
人還其人事如其事各無違拂此便是真實學問
當下不妥貼而人多怨望事多乖外尙堪言學哉
程伯淳吾學雖有所本天理二字卻是自已體貼
出來無時非當下無時不體貼伯淳百世師也

二十三日

夫子以無求安飽敏事慎言就正有道爲好學而生
平蔬水曲肱行庸德謫庸言動曰是吾憂何有於
我回之生平算瓢陋巷不情如愚而問不能問寡

故曰不如邱之好學有顏回者好學今之人情重
與此相反安飽亦無得意之事天大事都不願管
橫口而談居之不疑吾不知此之於學也何如作
德心逸日休作僞心勞日拙學之樂不學之苦蓋
天淵矣吾人飲水冷暖自知各自勉力是日詮孫
爲望兒慶五十七歲長幼咸集五世一堂兼二人
從遊在坐爲書此段

二十四日

學問之事助不可忘不可只有涵養克治而已入門
之始克治力居多進步之後涵養力居多功深力

到則隨克治隨涵養即涵養即克治無論有事無事此心常覺活潑

二十五日

夫道一而已矣故人生只有這件事人與禽獸草木皆秉天之氣而生人則天之靈氣故盡人性而物性皆盡矣仁與義禮智信皆從吾之性而出而仁則義禮智信之統體也故能安仁而義禮智信渾全矣綱舉目張寸鐵殺人與弄一草兵器自別

二十六日

理氣之說紛紛不一有謂理生氣有謂理爲氣之理

者有謂有是氣方有是理者通劉念臺云理即是氣之理斷然不在氣先不在氣外知此則知道心即人心之本心義理之性亦即氣質之本性一切紛紜之說可以盡掃矣

九月

初一日

聖人之道一感一應而已矣感應之道以人治人因物付物而已矣君子所以無適莫夫子所以絕四天下所以何思何慮也揖讓征誅行水絕謂之行其所無事應如是而如是天地自清寧鳥魚自飛

雖吾心自活潑不明於此逐日營擾不知所行何
事所謂莫不飲食鮮能知味誰不出戶何莫由道
鹿江村嘗云我輩明明白白過一日勝如糊糊塗
塗過一生知言哉

初二日

復楊鄂州書 稿入集

復段子襄書 稿入集

復李煉菴書 稿入集

初三日

子曰君子疾沒世而名不稱焉又曰君子去仁惡乎

成名則名固所以徵實也非此名將從前之仁人君子俱泯滅無聞何以法今傳後第實至而名不至不失爲君子如名至而實不至未免爲小人故聲聞過情君子恥之有此一恥則忠信進德修辭立誠自不至犯鬼神之忌闇的不止分君子小人而降解降殃天命實式臨之可畏哉可畏哉

高名厚利兩者俱非容易受享之物而放利好名嘔盡今古之人至好名一念尤中賢知之隱微故往往有輕殞其身如口節俠一流人蓋亦不少矣真實學道之儒利不足言名亦無意必得其名與不

失顯名皆無名心而名自隨之者也學道之人須
過節飲之闕方可入道

初四日

曾子養曾皙必有酒肉必請所與必曰有孟子謂之
養志曾元養曾子必有酒肉不請所與曰亡矣孟
子謂之養口體此等語亦要活看孔子蔬水出脰
顏子簞瓢陋巷必有酒肉必請所與必曰有勢不
能也夫子與子游論孝曰敬與子夏論孝曰色難
夫敬與色不在服勞奉養之外一事一飯必以誠
敬愉色將之便是仁至義盡如徒服勞奉養而獨

慕不存菽水何以承歡孝之道何以通神明也

初五日

贈素園李憲副詩 稿存原本

初七日

道統之傳自堯舜至孔子潛見惛躍飛亢位不一時

不一總歸於一中而已矣中德鮮能非賢知之過

則愚不肖之不及自堯舜以精一開萬世執中之

功孔子以時中妙萬世執中之用執之中自有時

非時則拘泥時之中自有執非執則游移善之臺

釐謬以千里此處未可以形跡求也程門教人看

喜怒哀樂未發前氣象此際正不容有絲毫形跡
耳

初九日

學者須先有一段靜氣方可言入道有靜氣則不避
聲色精神收斂心志亦漸清明動靜合一足就已
成言已成則無動靜之可分靜固靜動亦靜也革
車百輛無異蔬水曲肱學未成則無端之擾攘滅
於東而生於西此須時時戒慎恐懼體認天理驅
除人欲方可收戰勝之功

二十日

寄耿保汝書 稿入集

十月

初十日

弔蔣虎臣 虎臣少中虎人龍素心人學政門畿輔
書幣走河濱黃門圭約業弁言辱首掄請告歸田
里夏峯枉車輪軒冕來山谷新知若舊親賁臨辛
亥臘庵留王子春野餽嚴過籃村嚴戒逾矩談說
忘思謙謙坐畧主賓衰朽仰寬綽孺子沐真醅眷
言大■締造懍邈逸具狀儼再拜復乞誌幽珉
分手約再■賦緡問隣岫坐遊觀物化脫然遠世

塵壁題聯具在舟中句若新日月驚遷易莫由瞻
笑頰

十九日

與蕭韋佩 稿入集

與王枚卜 稿入集

二十四日

彰德許典三名三禮赴海甯任以長篇過贊夏峯臨
別曰先生何以教我曰夫子固言之矣事大夫之
賢友士之仁事字友字中是夫子所以陶鑄士大
夫以成其賢與仁徒事之友之豈夫子告子貢之

意大人格君心之非孝子喻親於道方成其爲忠
孝成已成人正己物正此方是孔孟本領

十一月

初二日

答耿逸菴書 稿入集

初六日

贈馬生生成均 稿入集

寄李性甫 稿入集

十三日

答陳子石問學 稿入集

二十日

寄孟調之書

稿入集

題忠齋手蹟

稿入集

二十二日

袁泰徵存省齋說

稿入集

十二月

十三日

復吳冉渠書

稿入集

十五日

復湯孔伯書

稿入集

諸公爲余祝九十之辰口占以謝 荏苒流光九十年
不問瞿曇不問仙學詩學禮羞無獲夙昔庭訓
凜昭宣履薄臨深恒在念持祝儼然手目先少年
聚順家庭樂東爨卽殷鳴鳥篇平生未敢忘三益
變澆滄桑客舍遷五世曾元饒厚幸一時賢友更
多緣蘭臭芬芳扶患難飄蓬旅處授田屋應求不
遠來千里提誨盡荒暮氣鞭初度撫懷驚虛度遠
邇詩文錦字連流情聲響中夜敬奉箴銘洗過
愈

十六日

題趙錦帆幽野歌驥卷 錦帆比部爲中州至盟

雅者三十年來蘇門即與之訂交更以身心性命之旨策我燭光頃見其令甘泉時秦人所贈交與歌與詩俱知錦帆治狀益信文人善吏事余之所醉心者此不過一端耳

二十四日

聞許佑之訃音愴然感而傷之 憶昔江村問學時
鷄群鶴立羨英姿昨聞君病今傳訃零落同人重
我悲

二十六日一

寄楊慕廬 書入集

寄吳陵季 書入集

癸丑祀竈之夜夢過公望齋頭醒而紀此 不登多

景樓屈指十年矣相望一舍間遙遙如千里昨夜

夢又過騎驢風雪裏頓忘年久衰神魂醒起

醒顧中素心斯妙理劉子時在坐聞之讚其是

歡頌叢桂堂斗酒佐雙鯉鷄鳴夢乍回儼然君在

九

日譜錄存卷之三十四終